



ҚАЗАҚСТАН ҰЛТТЫҚ БАНКІ

АҚПАРАТТЫҚ ХАБАРЛАМАЛАР

6 қазан 2016 г.

О. Смоляков – елдегі макроэкономикалық тұрақтылықты қамтамасыз етудің негізгі факторы туралы

Ұлттық Банк «2016 – 2018 жылдарға арналған республикалық бюджет туралы» Қазақстан Республикасының Заңына өзгерістер мен толықтырулар енгізу туралы» заң жобасындағы өлшемдерді қолдайды. Бұл жөнінде бүгін ҚР ҰБ Төрағасының орынбасары Олег Смоляков ҚР Парламентінің Сенатында баяндама жасаған кезде мәлімдеді.

«Ағымдағы жағдайда макроэкономикалық тұрақтылықты қамтамасыз етудің негізгі факторы Ұлттық Банктің ақша-кредит саясатын және Үкіметтің фискалдық саясатын үйлестіру болып табылады, – деді ол. – Сондықтан макроэкономикалық өлшемдер бірлесіп пысықталып, Ұлттық Банк тарапынан қолдау тапты».

Қазақстан Ұлттық Банкі инфляцияны 6-8% дәлізге қайтаруға ниеттеніп отыр

Ұлттық Банк инфляциялық таргеттеу саясатын және теңгенің еркін өзгермелі айырбастау бағамы режимін жүргізуін жалғастырады. Бұл жөнінде бүгін ҚР ҰБ Төрағасының орынбасары Олег Смоляков ҚР Парламентінің Сенатында сөз сөйлеген кезде хабарлады.

«ҚР ҰБ-ның негізгі мақсаты 2016 жылдың соңына қарай инфляция деңгейіне Үкімет пен Ұлттық Банк 2016 жылға белгілеген дәліз, яғни 6-8% шегінде жету болып табылады, – деді ол. – Ұлттық Банк таргеттелетін деңгейге қол жеткізуді қамтамасыз ету үшін ақша-кредит саясаты саласында бар күш-жігерін жұмсайды. Біз Үкіметтің және жергілікті атқарушы органдардың инфляцияны бақылау жөніндегі бірлескен іс-қимылы нығаяды деп сенеміз».

О.Смоляков мәлімдеген ҚР ҰБ-ның деректеріне сәйкес, 2016 жылғы қыркүйекте инфляцияның айлық деңгейі 0,2% болды, тамыздағы 17,6%-дан төмендей отырып жылдық көрсеткіш бойынша 16,6%-ды құрады. «Инфляцияның ең жоғары мәндері аяқталып, оның төмендеу үрдісі басталды. 2016 жылдың қорытындысы бойынша біз жылдық инфляция жоғарғы шегіне (6-8%) жетеді деп күтеміз», – деп толықтырды елдің қаржы реттеушісінің өкілі.

«2016 жылғы 3 қазанда Ұлттық Банк плюс минус 1% ауытқу дәлізімен базалық мөлшерлемені 12,5% деңгейге дейін төмендету туралы шешім қабылдады. Базалық мөлшерлемені төмендету сыртқы және ішкі нарық өлшемдерінің оң серпінінің нәтижесі болды», – деп атап өтті О.Смоляков.

Бүгін ҚР ҰБ Төрағасының орынбасары Олег Смоляков ҚР Парламентінің Сенатында «2016 – 2018 жылдарға арналған республикалық бюджет туралы» Қазақстан Республикасының Заңына өзгерістер мен толықтырулар енгізу туралы» заң жобасы бойынша

баяндама жасағанын еске саламыз.

Теңгенің еркін бағамы жағдайында АБР қалпына келу процесі басталды – ҚР Ұлттық Банкі

Теңгенің еркін бағамы саясаты елдің алтынвалюта резервтерін сақтап қана қоймай, оларды біртіндеп қалпына келтіру процесін бастауға да мүмкіндік берді. Бұл туралы бүгін ҚР ҰБ Төрағасының орынбасары Олег Смоляков «2016 – 2018 жылдарға арналған республикалық бюджет туралы» Қазақстан Республикасының Заңына өзгерістер мен толықтырулар енгізу туралы» заң жобасы бойынша ҚР Парламентінің Сенатында сөз сөйлеген кезде хабарлады.

Ол жылдың басынан бері 2,8 млрд. долларды құраған Ұлттық Банктің АБР өскенін атап өтті. ҚР ҰБ-ның деректері бойынша, Ұлттық Банктің алтынвалюта резервтері тамыздың соңында 30,7 млрд. доллар болды. Ұлттық қордың валюталық активтері 64,9 млрд. долларды құрады. Ел резервтерінің жалпы сомасы 95,5 млрд. долларға жетті (жыл басынан бастап – 91,4 млрд. доллар).

Сонымен бірге, О.Смоляковтың айтуынша, айырбастау бағамының еркін өзгеруі отандық өндірушілердің бәсекеге қабілеттілігін қолдауды қамтамасыз етеді және тауарлардың, сол сияқты көрсетілетін қызметтердің импорт алмасуын ынталандырады. «Біз бұл жағдайдың елдің төлем балансындағы ахуалды біртіндеп реттеуге мүмкіндік беретінін күтеміз», – деді ҚР ҰБ-ның өкілі.

Тұтастай алғанда, 2016 жылы ішкі валюта нарығындағы ахуал қалыпқа келді, - деп хабарлады О.Смоляков. «Теңгенің басқа валюталарға қатысты айырбастау бағамының өзгеруі сыртқы ортаның өзгеруіне жедел ден қоюға мүмкіндік береді, бұл белгіленген бағам кезінде орын алған теңгерімсіздіктердің жинақталуын болдырмайды», – деп қорытындылады ол.

Қазақстан Ұлттық Банкі қазақстандықтарға өз жинақтарын әртараптандыруды ұсынады

«Теңгенің қазіргі еркін өзгеруі жағдайында айырбастау бағамының әлсіреуі, сол сияқты нығаю мүмкіндігі бар. Сондықтан біз кәсіпорындарға және халыққа барлық жинақтарын шетел валютасында сақтамауға, оларды әртараптандыруға бірнеше рет кеңес бердік», - деді ҚР ҰБ басшысының орынбасары Олег Смоляков ҚР Парламентінің Сенатында сөз сөйлеген кезде.

Ол «қазіргі кезде халық үшін теңгемен депозиттер бойынша мөлшерлемелердің шетел валютасымен депозиттер бойынша мөлшерлемелерге қарағанда 7 есе тиімдірек екендігін» атап өтті.

«Біз 2016 жылы долларсызданудың белсенді процесі басталғанын көріп отырмыз. Жыл басынан бері теңгемен депозиттер 49%-ға немесе 2,4 трлн. теңгеге өсті, ал шетел валютасымен депозиттер 4,5%-ға немесе 500 млрд. теңгеге қысқарды, – деп атап өтті О.Смоляков өзінің баяндамасында. – Экономикадағы ақша ұсынысы, бірінші кезекте теңгемен бөлігі есебінен өсуде. Жыл басынан бері ақша массасының өсуі 10%-ға жуық болды (18 900 млрд. теңгеге дейін)».

Оның айтуынша, белгілі бір аралығы бар базалық мөлшерлеменің төмендеуі аясында депозиттік база мен ақша ұсынысының өсуі экономиканы кредиттеудің кеңеюіне ықпал ететін болады.

Бүгін ҚР ҰБ Төрағасының орынбасары Олег Смоляков ҚР Парламентінің Сенатында «2016 – 2018 жылдарға арналған республикалық бюджет туралы» Қазақстан

Республикасының Заңына өзгерістер мен толықтырулар енгізу туралы» заң жобасы бойынша баяндама жасағанын еске саламыз.

Ұлттық Банк банктердің депозиттік базасын нығайту шараларын іске асыруды жалғастырады – О. Смоляков

Ұлттық Банк Мемлекет басшысының ағымдағы жылдың 9 қыркүйегінде Үкіметтің кеңейтілген отырысында берген тапсырмаларын іске асыру шеңберінде Үкіметпен бірлесіп банктердің депозиттік базасын нығайту жөніндегі шараларды іске асыруды жалғастырады. Бұл банктерге ұзақ мерзімге кредит беру үшін қорландырудың орнықты базасын құруға мүмкіндік береді. Бұл туралы бүгін ҚР ҰБ Төрағасының орынбасары Олег Смоляков «2016 – 2018 жылдарға арналған республикалық бюджет туралы» Қазақстан Республикасының Заңына өзгерістер мен толықтырулар енгізу туралы» заң жобасы бойынша ҚР Парламентінің Сенатында сөз сөйлеген кезде хабарлады.

О. Смоляков өзінің баяндамасында сондай-ақ елдегі бизнесті кредиттеуге байланысты мәселелерді қозғады.

«Тамыздың қорытындысы бойынша экономикаға кредиттер өткен жылдың желтоқсанындағы деңгейде қалды – 12,7 трлн. теңге. Соған қарамастан, кредиттік портфельдің жекелеген секторларда: өңдеуші өнеркәсіпте 85,7 млрд. теңгеге, ауылшаруашылығында 80,2 млрд. теңгеге, құрылыста 31,4 млрд. теңгеге өсуі байқалды. Экономикаға берілген барлық кредиттің құрылымында 83%-ды 1 жылдан астам мерзімге берілген кредиттер құрайды», – деп деректер келтірді ҚР ҰБ басшысының орынбасары.

Ол шағын және орта бизнес субъектілерін дамытуды ынталандыру және баспананың қолжетімділігін қамтамасыз ету үшін мұндай қарыздар бойынша меншікті капиталдың жеткіліктілігіне талаптардың төмендетілгенін атап өтті. «Цифрлар бұл шаралардың белгілі бір әсері болғанын көрсетіп отыр. Мәселен, 2016 жылғы 8 айда шағын кәсіпкерлік субъектілерін кредиттеу 2,8 трлн. теңгеге дейін 728 млрд. теңгеге немесе 35%-ға ұлғайды», – деп қорытындылады О.Смоляков.

Толығырақ ақпаратты мына телефондар бойынша алуға болады:

+7 (727) 2704 585

+7 (727) 2704 697

e-mail: press@nationalbank.kz

www.nationalbank.kz